



17.10.2022

UKA2022/93

Kommunit aqqissugaanerisa allannguutaat pillugit Naalackersuisut nalilersuinissamik suliaqaqqullugit peqquneqassasut Inatsisartut aalajangiiffigisassaattut siunnersuut. Aqqissuussaannermi allannguutaasimasut pitsaaqutai ajoqutaalu nalilersorneqassapput, sumiiffimmilu demokratiimut kommunillu aningaasaqarnerannut sunniuteqarsimanersoq, kiisalu allaffissornikillisaaniarnermut siunertaasimasoq piviusunngortinneqarsimanersoq nalilersorneqassallutik. Nalilersuineq UPA2024 nallertinnagu Inatsisartunut agguaassorneqassaaq.

(Inatsisartunut ilaasortaq Aqqalu C. Jerimiassen, Atassut)

Siumumiit siunnersuuteqartoq Aqqalu C. Jerimiassen Atassut siunnersuuteqarneranut qutsavigaarput imatullu oqaaseqaateqassalluta:

Ilisimaneqartutuut Kommunerujussuit pilersinneqarneranni Siumut siuttuusimavoq.

Soorunami taamatut pilersitsineq siunertaqarpoq pitsaanagerusumik naligiinnerusumillu Kommunit ineriartortinneqassasut, kiisalu minnerunngitsumillu Kommunini innuttaasunut kiffartuussinerup siammassissumik assigiissarneqarnissaa pitsaanagerusunngortinnissaalu anguniakkamut qitiulluinnartoq ilisimavarput, tassami siusinnerusukkat kommunit 18-gallarmata innuttaasunik sullissineq assigiinngitsorujussuusimavoq, tamannalu pitsaanagerusumut saatinniarlugu aqqissuusseqqinnissaaq avaqqukkuminaasimasoq ilisimavarput.

Taamatut pilersitsinerup kingunerisaanik Kommunit sisamaasut pilersinneqarput, piffissalli ingerlanerani Kommunit ilaata aveqqinneqarnissaa pillugu innuttaasunik peqataatitsinikkut taasisitsisoqareermat pivoq. Tamanna innuttaasunut tusaaniarnertut paasinninnertullu pisoq iluarisimaarlugu maluginiarsimavarput.

Aammattaarlu pingaartilluinnarparput ullumikkumut killiffik eqqarsaatigalugu Kommunerujussuit nalilersortuarnissaaq pisariaqartoq, tassami aqqissuussap angisuup sapinngisamik pitsaasumik innuttaasunut atugassarititaqarnissaa piffinnilu qanimut oqartussaaqataanerup misiguarneqarnissaa pingaartilluinnaratsigu oqaatigissavarput.

Siunnersuuteqartup siunnersuummini qiteritippaa ullumikkumut killiffik pillugu nalunaarusiortoqassasoq, tamannalu UPA 2024-mi Inatsisartunut agguaanneqassasoq kissaatigalugu.

Tassunga tunngatillugu Naalackersuisut akissutaanni maluginiarparput, Naalackersuisut pingaartitarigaat Kommunit namminneerlutik aqqissugaanertik pillugu nalilersuisuussaannerat, aammalu naalackersuinikkut Ataqaatigiissaarisooqatigiit tullissaani ataatsimiinnissaanni tamatuma eqqartugassatut qaqqinneqarnissaannik manna suliaqartoqartoq. Tamanna Siumumiit



tusarluparput pissangassaagullu qanoq siunnerfilimmik oqallissimanerup inerneqarsimanera tusassallugu.

Taamaasilluta qanoq isikkulimmik piffissami qanittumi suleriaqqinnissaq siunertaralugu alloriassinnaanarluta paasissuarput, tassami Kommunit namminiussuseqarlutik oqariartuuteqarnissaat pingaartilluinnarlutigu ataqqilluinnaratsigu, ilisimagatsigu arlaagut pikialaartoqartuortoq qanoq isikkulimmik Kommunit aqqissuuteqqinneqarnissaannut tunngasunik, ilaatigut siunnersuutit qaqqinneqartartut, aammalumi innuttaasut suliniuteqartut assigiinngitsut ingerlasut ilisimaaraagut, tamakkulu qanoq alloriassanersut pissangalluta alaatsinaappagut tunngavissiisinnaanerallu ilumut alloriarfiussanersut nalilersorsinnaassanut qilanaaralutigit.

Tassa Kommunit pillugit oqallinneq unigani ingerlajuassasoq naatsorsuutigilluinnarparput, tamannalu pillugu oqalliseqataassaagut, minnerunngitsumillu innuttaasut isumaasa tusaaneqarnissaannut illersuissaagut ataqqinnillutalu pissalluta.

Taamaattumik Naalakkersuisut innersuussutaat suliap sukkanerusumik ingerlanissaa pillugu akuersaarparput, siunnersuuteqartup aatsaat UPA 2024-mi saqqummiisoqassasoq siunnersuutaa tunngaviatigut paasigaluarlugu, siunnersuut itigartipparput.

Jens Kristian Therkelsen, Siumut